

ҚАЗАҚСТАН  
РЕСПУБЛИКАСЫНЫҢ  
ПРЕМЬЕР-МИНИСТРІ



ПРЕМЬЕР-МИНИСТР  
РЕСПУБЛИКИ  
КАЗАХСТАН

010000, Астана қаласы, Үкімет үйі

010000, город Астана, Дом Правительства

№ \_\_\_\_\_

Қазақстан Республикасы Парламенті  
Мәжілісінің депутаттарына,  
«RESPUBLICA» фракциясының  
мүшелеріне

2023 жылғы 21 сәуірдегі № ДС-89

**Құрметті депутаттар!**

Жүргізуші куәліктерін алуға қатысты депутаттық сауалды қарап, мынаны хабарлаймыз.

«Жол қозғалысы туралы» Заңның 10-бабына сәйкес жүргізуші куәлігін беру және емтихандарды қабылдау процестерін айқындау құзыреті Ішкі істер министрлігіне бекітілген.

«Азаматтарға арналған үкімет» мемлекеттік корпорациясы (бұдан әрі – Мемлекеттік корпорация) «Мемлекеттік көрсетілетін қызмет туралы» Заңның 11-1-бабына сәйкес мемлекеттік қызметтер көрсетуге өтінішті қабылдау, сондай-ақ «бір терезе» қағидаты бойынша дайын құжаттарды беру жөніндегі қызметті жүзеге асыратын бірыңғай провайдер болып табылады.

Жүргізуші куәлігін алу рәсімі Ішкі істер министрінің 2014 жылғы 2 желтоқсандағы № 862 бұйрығымен бекітілген «Көлік құралының сәйкестендіру нөмірі бойынша көлік құралдарының жекелеген түрлерін мемлекеттік тіркеу және есепке алу, механикалық көлік құралдарын жүргізушілерді даярлау, емтихандар қабылдау және жүргізуші куәліктерін беру қағидаларымен» (бұдан әрі – Қағидалар) регламенттелген.

Қағидаларға сәйкес кандидат тиісті құжаттарды ұсынғаннан кейін теориялық және практикалық емтихандарды тапсыруға жіберіледі.

**Анықтама:** теориялық емтихан тапсырмаған үміткер практикалық емтиханға жіберілмейді.

Бұл ретте теориялық немесе практикалық емтихандарды тапсыру кезінде үш теріс баға алған жағдайда, кандидат емтихандарды кейінгі тапсыруға соңғы емтихан өткізілген күннен бастап **алты айдан кейін** жіберіледі.

Мемлекеттік корпорация мен ішкі істер органдарының қызметкерлері тарапынан сыбайлас жемқорлық тәуекелдерін болдырмау мақсатында 2022 жылғы наурыздан бастап **пилоттық режимде** емтихан тапсырушылардың

жеке басын биометриялық сәйкестендіруді пайдалану, емтихандар тапсыру процесін бейнетіркеу, қағаз құжат айналымын алып тастау іске асырылды, ал жүргізуші куәлігін алуға емтихандарды қабылдау функциясы аутсорсингке берілді (бұдан әрі – пилоттық жоба).

**Анықтама:** пилоттық жоба шеңберінде оператор айқындалды, оның міндеттеріне аппараттық бағдарламалық кешенді рұқсатсыз кіруден және операциялардан қорғауды қамтамасыз ету, емтихан сыныптарын инфрақұрылыммен қамтамасыз ету және емтихан қабылдауды сүйемелдеу кіреді.

Пилоттық жоба «Мемлекеттік көрсетілетін қызметтер туралы» Заңның 22-бабының екінші бөлігіне сәйкес және уәкілетті органдардың бірлескен бұйрығы негізінде іске асырылып жатыр.

2022 жылдың қорытындысы бойынша жете тексеру және техникалық сүйемелдеу талаптарының күшеюіне байланысты оң нәтижемен тапсырылған емтихандар санының 12,5 %-ға төмендеуі байқалады (2021 жылы – 61,6 %, 2022 жылы – 49,1 %).

Қағидаларға оқу ұйымдарының қызметіне мониторингті күшейтуді («Автомектеп» ААЖ-да оқу ұйымдарын, оқу топтарын және курсты аяқтағаны туралы куәліктерді есепке алу, қашықтан оқытуды болдырмау), емтихан сыныптарын жарақтандыруға қойылатын ең төмен талаптарды белгілеуді, биометриялық деректердің көмегімен емтихан тапсырушының жеке басын міндетті сәйкестендіруді, емтихан тапсыру кезінде бейнебақылау жүйесін пайдалануды, жүргізуші куәлігінің күшін жою жағдайларының тізбесін айқындауды, «электрондық үкімет» порталы және ақпараттандыру объектілері арқылы емтихан тапсыруға өтінім беру мүмкіндігін және т.б. көздейтін түзетулер әзірленді.

Сыбайлас жемқорлық белгілері бар тәуекелдерге іргелі талдау жүргізу және мемлекеттік көрсетілетін қызметтің осы түрін бәсекелес нарыққа беру мәселелері бойынша уәкілетті мемлекеттік органдарға тапсырма берілгенін қосымша хабарлаймыз.

Мемлекеттік қызметтер көрсету мәселелері жөніндегі ведомствоаралық комиссияның қарау қорытындысы бойынша тиісті ақпаратты Цифрлық даму, инновациялар және аэроғарыш өнеркәсібі министрлігі сіздердің атыңызға жіберетін болады.

**Ә. Смайылов**